

নিত্যসিদ্ধ মহাত্মার দিব্যদর্শনে—শ্রীরামকৃষ্ণ লীলা
শ্রীবিষ্ণুপদ সিদ্ধান্ত ঠাকুর
(১৯)

শ্রীরামকৃষ্ণদেব একদিন ঘরের দরজা বন্ধ করে মা ভবতারিণীকে প্রশ্ন করছেন— “আচ্ছা মা! এরা যে আমার কাছে আসছে, এরাও তো তোরই ছেলে? তবে আমার সঙ্গে যেমনভাবে কথা বলছি, আমার সব কথারই উত্তর দিচ্ছি, তাদের এমনি করে দেখা দিস্না কেন? এমনিভাবে কথার উত্তরই বা দিস্না কেন? এতে লোকেতো তোকেই দোষ দেবে? তুই ওদের কাছে পুতুল সেজে থাকিস্ আর আমার কাছে মানুষের মতো কথা ক’স, এ-তোর কোন দেশী বিচার মা।”

মা ভবতারিণী উত্তর দিলেন— “ওদের সঙ্গে তো আমি কথা কই, দেখা দিই কিন্তু ওরা আমার কথা শুনতেও পায় না আর দেখতেও পায় না। ওরা কালা হয়ে থাকে তাই কালী মায়ের কথা শুনতে পায় না। কোনো পড়ুয়া ছেলের কানের কাছে ঢাক বাজলেও যেমন সে শুনতে পায় না, ওরাও তেমনি বিষয়-বাসনার আকর্ষণে এত তন্ময় হয়ে থাকে যে, আমার কথা শুনতে পায় না। তোর মত ওদেরও যখন কানের চাপা খুলে যাবে, তখন ওরাও তোরই মতো আমার কথা শুনতে পাবে। সেইজন্য তোর দ্বারায় আমি ওদের দেখাব যে, আমি সবারই সঙ্গে কথা বলি, সবাইকে আমি দেখা দিই।”

রামকৃষ্ণদেব বললেন, “ওদের আমি বলি যে, আমি মায়ের সঙ্গে কথা কই, কিন্তু নরেন ছাড়া ওরা আমার কথা বিশ্বাস করে নিতে পারে না; তা নরেনকে তুইতো দেখা দিতে পারিস, ওর যখন খানিকটা বিশ্বাস হয়েছে, তখন ওকে দেখা দিলে ক্ষতি কি মা?”

ভবতারিণী মা বললেন, “নরেন তোর দরজার গোড়াতে বসে রয়েছে, সারারাত্রি তোরই মূর্তি দর্শন করেছে; তাই ভোরে উঠেই হাঁটতে হাঁটতে তোরই দর্শনে ছুটে এসেছে তুই দরজা খুলে ওকে ঘরের মাঝে ডেকে নিয়ে আয়।”

রামকৃষ্ণদেব বললেন, “তা আমি খুলে দিচ্ছি কিন্তু ওকে দেখে লুকিয়ে পড়িসনে, তোর এমনি দেবীরূপ একবার ওকে দেখতে দে’মা!”

মা ভবতারিণী বললেন, “তুই বড্ডা বোকা ছেলে। আরে! চোখের ঠুলি না খুললে দেখবে কেমন করে? তোকে ওসব কথা ভাবতে হবে না; আজ তুই ওকে কেবল বলবি যে, ‘মায়ের কাছে এসে কিছু একটা নূতন খাবার চেয়ে নে’—ওকে যে কোনো একটা ফলের নাম করতে বলবি, যা এসময়ে পাওয়া যায় না। যে ফলেরই নাম সে করবে, আমার শাড়ীর পেছনেই তা রাখা থাকবে, তুই তখনই সেটা নিয়ে ওর হাতে দিবি, তা’হলেই ওর প্রিয়ভাব আর ভক্তিভাব অনেকখানি বেড়ে যাবে বুঝলি?”

এ কথায় রামকৃষ্ণদেব চোখের জল মুছতে মুছতে উঠে দাঁড়ালেন আর সঙ্গে সঙ্গে আঁট সাঁট দরজাটা খুলে গেল। নরেন দরজা ধরে ঘুমিয়ে পড়েছিলেন, দরজা খোলার সঙ্গে সঙ্গে তিনিও ঘরের মধ্যে সশব্দে রামকৃষ্ণদেবের পায়ের কাছেই পড়ে গেলেন।

পড়ার শব্দের সাথে সাথে কে যেন বলে উঠল— “কী হল রে?” ধাক্কা খেয়ে নরেন মুহূর্তের মধ্যে উঠে দাঁড়িয়ে জিজ্ঞাসা করলেন, “মন্দিরে আপনার সাথে আর কি কেউ আছেন? নারীকণ্ঠে, কাতর-কণ্ঠে কে এ কথা বলে উঠলেন?”

রামকৃষ্ণদেব চোখের জলে বুক ভাসিয়ে উত্তর দিলেন, “আমার কণ্ঠধ্বনি যখন নয়, তখন এখানে এক মা ছাড়া আর কে থাকতে পারে?”

বিবেকানন্দ বিমুগ্ধ স্বরে বললেন — “না, আমি তা বলছি না। আমি স্পষ্ট সারদা ময়ের কণ্ঠধ্বনি শুনলুম, তাই আপনাকে জিজ্ঞাসা করছি; তিনি এখানে না থাকলে তাঁর কণ্ঠধ্বনি কে শোনালা?”

রামকৃষ্ণদেব বললেন, “দেখছিস না, মা দাঁড়িয়ে তোর কথা শুনে হাসছেন। এই জন্যই মা এখুনি বলছিলেন, চোখের ঠুলি না খুললে তোকে খুশী করা যাবে না। আয় তো, মায়ের চরণ-ধোয়া জলে চোখটা মুছে দিই—ইস্ মায়ের চরণধোয়া জলটাকেও তুই ধাক্কা দিয়ে ফেলে দিয়েছিস! থাকগে, এই

গঙ্গাজল দিয়েই তোর চোখ ধুয়ে দিই”—

এ কথায় স্বামীজী রামকৃষ্ণদেবের পায়ের কাছে গড়িয়ে পড়ে, উত্তর দিলেন, “আমি রাশি রাশি গঙ্গাজলে চোখ ধুয়েছি কিন্তু কোন দিন তোমার মাকে দেখিনি, কেবল তোমাকে দেখেছি। তবে তোমার ছোঁয়া গঙ্গাজল যদি সুরধুনীর জল হয়ে যায়, তবে হয়তো কিছুটা ফল, ফলতে পারে।”

এ প্রশ্নে রামকৃষ্ণদেব বলে উঠলেন— “হ্যাঁ হ্যাঁ, মায়ের আরেকটা কথা মনে পড়ে গেল— এই সময় কিছু অসময়ের পাকা ফলের কথা বলতে পারিস? আজ তোকে আমি তাই খাওয়াব— যে কোন একটা পাকা ফলের নাম কর যা, এসময় সারা বাংলা দেশেও পাওয়া যাবে না।”

কথা শুনে বিবেকানন্দ খানিকটা বুদ্ধিভ্রষ্টের মত উত্তর দিলেন “পাকা খেজুর”—

রামকৃষ্ণদেব বললেন, “পাকা খেজুর! আরে এখনতো সারা বাংলাদেশেই পাকা খেজুর পাওয়া যায়, তবে আর নূতন ফলের কথা কি জানালি?”

স্বামীজী লজ্জিত হয়ে বললেন, “তোমার কাছে এসে আমার সবই ভুল হয়ে যায়, দাঁড়াও আমি একটু ভেবে বলছি”— ভাবা হল না— নরেনের চোখের জলে রামকৃষ্ণদেবের পা ভিজে গেল, স্বামীজী কৈঁদে কৈঁদে শুধু রামকৃষ্ণদেবের পা দুটো জড়িয়ে ধরে আকুল প্রার্থনায় গেয়ে উঠলেন—

“দাও প্রেম, দাও ভক্তি, জীবে দয়া

রামকৃষ্ণ নাম ছড়াও বিশ্বে ভিজুক সবার হিয়া।”

রামকৃষ্ণদেব খানিকক্ষণ পর বিবেকানন্দকে বললেন— “মায়ের লীলাখেলা বুঝিনা; মা আমাকে হুকুম করল — ‘নরেন এসেছে, দরজা খুলে দে।’ আমি উঠে দাঁড়ালুম দরজা খুলতে কিন্তু তার আগেই দেখলুম দরজাটা যেন মায়ের হুকুম শুনতে পেয়ে নিজেই মায়ের আজ্ঞা পালন করে ফেলল। এখানে সবাই যেন মায়ের এক একটি জীবন্ত প্রতিমা। এমন কি চন্দন সেটাও যেন আপনা আপনি চন্দন সাজে সেজে থাকে, আমায় চন্দনটি পর্যন্ত ঘষতে হয় না, মায়ের চরণে বেলপাতা দেবার আগেই ওরা উড়ে গিয়ে মায়ের চরণে হাজির হয়। দরজাটা যদি মায়ের শক্তি না পেতো, তবে কি তুই ওখানে দাঁড়িয়ে থেকেই ঘুমিয়ে পড়তিস? এখানকার প্রতি ধূলিকণাটিও এক একটি প্রতিমা। তুই কিছু প্রসাদ খাবি? আজ তুই যে কোনো প্রসাদী বস্তুর নাম করবি, আজ তোকে সেই জিনিসই মায়ের কোল থেকে এনে দেব।”

এ কথায় বিবেকানন্দ কোন উত্তর দিতে পারলেন না: শুধু

রামকৃষ্ণদেবের পায়ের দিকে একদৃষ্টে তাকিয়ে থাকতে থাকতে মনে মনে বললেন — “তোমার চরণ চাইলে সব চাওয়া-পাওয়ার কথাই ভুল হয়ে যায়: তবু অহংএর যেটুকু কণা পড়ে থাকে তাই দিয়ে তোমায় বলি, মায়ের কোল থেকে রূপোর কোশাকুশি হতে হিমগিরির ঠাণ্ডা জল এখন পান করাতে পার?”

রামকৃষ্ণদেব সজল চোখে উত্তর দিলেন — “হ্যাঁ হ্যাঁ, তাও পারি; তুই একটু পুৰমুখো হয়ে বস, আমি এখনই মায়ের কোল থেকে কোশাকুশির হিমালয়ের জল এনে দিচ্ছি।”

স্বামীজী ছবির মতই বসে রইলেন। সজল চোখ আরও ভারী হয়ে উঠল।

রামকৃষ্ণদেব বললেন, “এই নে, দেখলি তো, মায়ের কোল থেকেই এই ঝিলিকমারা আর বিজলীপোরা কোশাকুশি পেলুম। চোখ চেয়ে দেখ, এটা কত কনকনে ঠাণ্ডা! কিন্তু কইরে, এতে জল কোথা? এঁত দেখছি, মায়ের দুটো সজল চোখ মাত্র। মায়ের বাঁ চোখটা হয়েছে কোশা আর ডান চোখটা হয়েছে কুশি। ঠিক যেন লবকুশের মত আমার দিকে তাকিয়ে রয়েছে। কিন্তু তার হুকুম মত সবই পেলুম হিমালয়ের হিম-গিরি কন্যাও হাতে এলো, এত বরফস্তূপের মত কনকনে যে, আমি হাতের মাঝে রাখতে পারছি না; কিন্তু জল কই? জলটা বরফ হয়ে এতেই জমে আছে নাকি?”

স্বামীজী বিস্ময় চোখের দৃষ্টি ফেলে সজল চোখে উত্তর দিলেন — “এমন অপূর্ব ও ক্ষুদ্র কোশাকুশি যে এ জগতের কোন মন্দিরে থাকতে পারে, এও আমার কল্পনার বাইরে। এ দুটি যেন বিজলী-তৈরী, সাগর-সৈকতের দুটি ঝিনুক মাত্র। এতে সাত ফোঁটা জলও ধরে কিনা সন্দেহ। মায়ের জগৎ এতই রহস্যময়? আজ আবার একী দেখালে ঠাকুর!”

রামকৃষ্ণদেব সহজ সুরে স্নিগ্ধ হাসি ছড়িয়ে উত্তর দিলেন— “তাতো বুঝলাম, কিন্তু এতে জল কই?” এই বলতে বলতে তিনি যেই সে ক্ষুদ্র কোশাকুশি দুটিকে উপুড় করে ধরলেন, অমনি তা থেকে ফোঁটায় ফোঁটায় স্নিগ্ধ হিমগিরির কনকনে জল মাটিতে গড়াতে লাগল। মার্বেল পাথরের মেঝেতে মুহূর্ত্ত মধ্যে যেন হিমালয় পাহাড়ের বরফস্তূপ জমা হতে লাগল। সমস্ত পাথরের মন্দির থেকে বরফের ধোঁয়া বেরতে লাগল।

এরূপ অলৌকিক দৃশ্য দেখে, রামকৃষ্ণদেবও আর স্থির হয়ে দাঁড়িয়ে থাকতে পারলেন না। অজস্র চোখের জল ফেলতে ফেলতে নরেনকে বললেন — “ওরে! এয়ে আর এখানে দাঁড়িয়ে থাকতে পারছি না, বোসতে পারছি না, আবার

শুয়ে পড়তেও পারছি না। এখন পালাব কেমন করে?”

স্বামীজী এ সময় খুবই কেঁপে কেঁপে উঠছিলেন, লক্ষ লক্ষ বরফস্তুপের মধ্যে থেকে যেন একবারে বাহ্যজ্ঞান লুপ্ত হয়ে পড়ল। রামকৃষ্ণদেব নিশ্চল এক বরফস্তুপের মতই নিস্তব্ধে দাঁড়িয়ে রইলেন।

ঠিক এই সময়ে রাণী রাসমণি মন্দিরে প্রবেশ করেই বলে উঠলেন, “একি! মন্দিরে এত বরফের স্তুপ কেন? ঠাকুর কোথা? কে তুমি গৌরীবেশে এ ঘরে শিবের পূজা করছ?

রামকৃষ্ণ কোথায় গেলেন?”

পরের মুহূর্তে মথুর বাবু মন্দিরে ঢুকেই উত্তর দিলেন — “একি অদ্ভুত কথা বলছেন রাণী? রামকৃষ্ণদেব তো আপনার সম্মুখেই ধ্যানস্থ হয়ে দাঁড়িয়ে রয়েছেন! আপনার পায়ের কাছে নরেনও ধ্যানস্থ রয়েছেন, তাও কি চোখে পড়ছে না?”

রাণী রাসমণি ক্ষণেক চমকে উঠে ধীর বিনম্র সুরে চোখের জল মুছতে মুছতে উত্তর দিলেন — “না” —

...ক্রমশঃ

